

《佛說無量壽經》 補充講表

◎附表三十三：以下糅合《佛說無量壽經甄解》

○究竟菩薩諸波羅蜜，修空、無相、無願三昧，不生不滅諸三昧門，遠離聲聞緣覺之地。

*《文殊師利所說摩訶般若波羅蜜經》云：「般若波羅蜜，不見有法可取、可捨。如修般

若波羅蜜，亦不見涅槃可樂、生死可厭。」

*《華嚴經》·離世間品云：「心常正定，善入菩薩不思議解脫門，於一三昧中，出生一

切諸三昧故。」

○何不力為善，念道之自然。

※《大勢至菩薩念佛圓通章》云：「十方如來，憐念眾生，如母憶子；若子逃逝，雖憶何為？

子若憶母，如母憶時，母子歷生，不相違遠。若眾生心，憶佛、念佛，現前

當來，必定見佛，去佛不遠；不假方便，自得心開。如染香人，身有香氣。」

※《佛說觀無量壽佛經》云：「諸佛如來，是法界身，入一切眾生心想中。是故汝等心想佛時，是心即是三十二相，八十隨形好。是心作佛，是心是佛。諸佛正徧知海，從心想生。」

※明貪瞋癡（三毒）三煩惱

*《大乘百法明門論直解》云：「煩躁擾動，惱亂身心，故名煩惱。」

*《大乘百法明門論直解》云：

「貪者，於有、有具，染著為性。能障無貪善根，生苦為業。」

「瞋者，於苦、苦具，憎恚為性。能障無瞋善根，不安隱性。惡行所依為業。」

「無明者，亦名為癡。於諸理事，迷闇為性。能障無癡善根，一切雜染所依為業。」

○然世人薄俗，共諍不急之事，於此劇惡極苦之中，勤身營務，以自給濟。……無有安時。

*《佛說八大人覺經》云：「第一覺悟：世間無常，國土危脆，四大苦空，五陰無我。生滅

變異，虛偽無主。心是惡源，形為罪藪。如是觀察，漸離生死。」

又云：「第二覺知：多欲為苦，生死疲勞，從貪欲起。少欲無為，身心自在。」

又云：「第三覺知：心無厭足，唯得多求，增長罪惡。菩薩不爾，常念知足，安貧守道。

唯慧是業。……復還生死，度脫眾生，以前八事，開導一切，令諸眾生，覺生死苦，捨離五欲，修心聖道。」

*《佛遺教經》云：「此五根者，心為其主，是故汝等當好制心。心之可畏，甚於毒蛇，惡

獸、怨賊，大火越逸，未足喻也。譬如有人，手執蜜器，動轉輕躁，

但觀於蜜，不見深阮。……汝等比丘，當知多欲之人，多求利故，

苦惱亦多；少欲之人，無求無欲，則無此患。」

○然含毒畜怒，結憤精神，自然剋識，不得相離，皆當對生，更相報復。

*《大寶積經》卷第五十七：「假使經百劫，所作業不亡；因緣會遇時，果報還自受。」

○如此之人，矇冥抵突，不信經法，心無遠慮，各欲快意。

*《佛說無量壽經甄解》云：「矇，蒙覆不明也。冥，闇昧無知也。抵突者，『唐突』，謂

無所了知，觸事違犯，如小兒夜行，狂犬妄走，無所不作也。」

○恩愛思慕，憂念結縛，心意痛著，迭相顧戀，窮日卒歲，無有解已。

*《佛說四十二章經》云：「佛言：人從愛欲生憂，從憂生怖。若離於愛，何憂何怖？」

*《圓覺經》清淨慧菩薩章云：「一切眾生，從無始來，由妄想我，及愛我者，曾不自知

念念生滅，故起憎愛，耽著五欲」。

*《圓覺經》淨諸業障菩薩章云：「我身本不有，憎愛何由生？」